



RIALACHAS AGUS STRUCHTÚR

Caibidil 9: Rialachas agus Struchtúr

Struchtúr dlí

Is cuideachta faoi theorainn rátháíochta é ÚMICÉ ag a raibh na 10 gcomhalta seo a leanas an 31 Nollaig 2022:

- Comhlachas na gCuntasóirí Deimhnithe Cairte*
- Comhlachas na gCuntasóirí Idirnáisiúnta*
- Institiúid Cairte na gCuntasóirí Bainistíochta*
- Institiúid Cairte an Airgeadais Phoiblí agus na Cuntasaíochta*
- Banc Ceannais na hÉireann
- An tÚdarás um Fhorfheidhmiú Corparáideach
- Institiúid na gCuntasóirí Deimhnithe Poiblí in Éirinn*
- Institiúid na gCuntasóirí Cairte in Éirinn*
- Stocmhalartán na hÉireann
- Na Coimisinéirí Ioncaim

* CCF

Struchtúr eagraíochtúil

Forléargas

Faoi dheireadh na bliana, 30 ball foirne a bhí ag ÚMICÉ (2021: 32), agus iad roinnte ina seacht n-aonad mar seo a leanas:

- **An tAonad Cáilíochta Iniúcháireachta** a dhéanann cigireacht ar cháilíocht iniúchtaí ar ELPanna;
- **An tAonad Maoirseachta um Thuairisciú Airgeadais** a dhéanann scrúdú ar thuarascálacha airgeadais eintiteas ar leith le fáil amach an bhfuil siad i gcomhréir leis an gcreat ábhartha tuairiscithe airgeadais;
- **An tAonad Maoirseachta ar Rialáil agus ar Fhaireachán** a dhéanann maoirseacht ar rialáil CCFanna ar a gcomhaltaí;
- **An tAonad Caighdeán agus Beartas** atá freagrach as caighdeán agus treoir maidir leis an iniúcháireacht a ghlacadh in Éirinn;
- **An tAonad Forbartha Eagraíochtúla** a mhaoirsionn cur i bhfeidhm na dtionscadal nuálaíochta faoi stiúir na foirne, a thacaíonn le coistí éagsúla an Údaráis a stiúirann an

fhoireann, agus a bhainistíonn láithreach inmheánach cumarsáide agus meán sóisialta ÚMICÉ;

- **An tAonad um Fhorfheidhmiú** a thugann faoi imscrúduithe agus fiosrúcháin reachtúla an Údaráis; agus
- **Aonad na Seirbhísí Corparáideacha** a sholáthraíonn tacaíocht bainistíochta do ÚMICÉ maidir le cúrsaí airgeadais, riaracháin, acmhainní daonna, TFC agus saoráidí, mar aon le rúnaíocht a sholáthar don bhord agus do choistí áirithe dá chuid.

Líon formheasta na mball foirne


Is é ÚMICÉ a chinneann líon, gráid, agus téarmaí agus coinníollacha fhoireann ÚMICÉ le formheas an Aire, rud a thugtar le toiliú ón Aire Caiteachais Phoiblí agus Athchóirithe. Fágann sin gur gá formheas a fháil roimh ré ón mbeirt Airí chun aon leasuithe a dhéanamh ar líon foirne formheasta ÚMICÉ. Leagtar amach thíos líon foirne formheasta ÚMICÉ i ndeireadh na bliana, agus a líon foirne iarbhír.

Líonta foirne formheasta agus líon iarbhír i ndeireadh na bliana

Grád	Formheasta	Iarbhír
An Príomhfheidhmeannach	1	1
Cinn Feidhme	5	3
Bainisteoirí Sinsearach	6	6
Cigirí agus Bainisteoirí Tionscadail	11	9
Lucht Feidhmiúcháin agus Riaracháin	16	11
Iomlán	39	30

Cairt eagraíochta

Bhí struchtúr eagraíochtúil ÚMICÉ amhail an 31 Nollaig 2022 mar a leagtar amach sa chart eagraíochta thíos.



Forléargas ar chúrsaí airgeadais

Den chuid is mó, maoinítear ÚMICÉ trí dheontas ón Státchiste, tobhach reachtúil ar na CCFanna, tobhach reachtúil ar ghnólachtaí a dhéanann iniúcháireacht ar ELPanna, agus trí tháillí a ghearradh as seirbhísí clárúcháin. Déantar na foinsí cistiúcháin uile a rialú le forálacha an Achta. Ina cháil mar chuideachta faoi theorainn ráthaíochta, tugann ÚMICÉ ráitis airgeadais ar aird i gcomhréir le hAcht na gCuideachtaí, agus déanann an tArd-Reachtaire Cuntas agus Ciste iniúchadh orthu dá réir agus taisceann leis an Oifig um Chlárú Cuideachtaí iad.

B'ionann an caiteachas iomlán in 2022 agus €4.3m (2021: €4.4m) ó bhuiséad €5.6m (2021: €6.0m). Ba iad na príomhathruithe i gcomparáid leis an mbuiséad:

- gannchaiteachas mór ar chostais taistil agus chothaithe agus ar chaiteachas oifige mar gheall ar thionchar COVID-19; agus
- coigilteas i gcomhairleoireacht, ar suim theagmhach é go príomha chun gur féidir leis an Údarás íoc as imscrúduithe agus fiosrúcháin reachtúla más gá.

Rialachas

An bord stiúrthóirí

Rialaíonn naonúr stiúrthóirí ÚMICÉ agus tá ochtar díobh sin ina stiúrthóirí neamhfheidhmiúcháin. Ceapann an tAire iad ar bhonn ainmniúcháin ó na heintitis sin a leagtar amach thíos. Is é an stiúrthóir eile an Príomhfheidhmeannach, arna cheapadh ag an mbord.

An bord stiúrthóirí – comhlachtaí ainmniúcháin

Comhlacht ainmniúcháin	Ainmnithe
An tAire	2
CCFanna (i gcomhpháirt le chéile ar bhonn comhaontú)	2
Banc Ceannais na hÉireann	1
An tÚdarás um Fhorfheidhmiú Corparáideach	1
Stocmhalartán na hÉireann	1
Na Coimisinéirí Ioncaim	1
Iomlán	8

Triúr den ochtar stiúrthóirí sin ar a mhéad a fhéadfaidh a bheith ina gcomhaltaí de CCF.

Beathaisnéisí na stiúrthóirí



Tá taithí ar feadh an tsaoil ar chúrsaí rialála agus gnó ag **Martin Sisk, an Cathaoirleach**. Is atur nae cáilithe é agus chuir sé tús lena ghairm bheatha in Oifig na gCoimisinéirí Ioncaim, d'fhóin sé mar Chláraitheoir na gCara-Chumann 1985–2003, Leas-Chláraitheoir na gComhar Creidmheasa 2003–2006, Leas-

Cheann na gCód Cosanta Tomhaltóirí 2007–2008 agus Ceann an Aonaid um Fhrithsciúradh Airgid, Maoiniú Sceimhlitheoireachta agus Smachtbhannaí Airgeadais de chuid an Bhainc Ceannais 2008–2010. Chuaigh sé ar scor ón mBanc Ceannais i mí Iúil 2010. Toghadh Martin chuig bord Chomhar Creidmheasa Mhullach Íde agus na Dúiche i mí na Nollag 2010 agus is Stiúrthóir é go fóill. D'fhóin sé mar choimisinéir ar Choimisiún na Scrúduithe Stáit ó 2017 i leith, agus mar chomhalta boird de Bhord an Chiste Náisiúnta um Cheannach Cóireála ó 2021. Is iarchomhalta boird (2011–2021) de chuid Chomharchumann na gComhar Creidmheasa in Éirinn é Martin agus bhí sé ina leas-uachtarán air (2011–2013) agus ina uachtarán air (2013–2015), ba stiúrthóir agus cathaoirleach ar VHI Healthcare (2012–2015) é, agus ba chomhalta boird é de chuid an Údaráis um Fhaisnéis agus Cálíocht Sláinte (2015–2020).



Tháinig **Kevin Prendergast, an Príomhfheidhmeannach**, ag obair le ÚMICÉ i mí na Samhna 2016 tar éis a bheith ina Cheann Forfheidhmiúcháin leis an Údarás um Fhorfheidhmiú Corparáideach. Bhí sé fostaithe ag an Údarás sin ó 2005. Roimhe sin, bhí sé ag obair i Rannán na gCásanna Móra de chuid Oifig na gCoimisinéirí Ioncaim agus tá taithí roinnt blianta aige san earnáil phríobháideach freisin lena n-áirítear roinnt blianta a chaith sé ag obair i ngnólacht iniúcháireachta. Is Comhalta é Kevin de chuid Chuntasóirí Cairte Éireann. Tá Céim Baitsiléara agus Máistreacht aige sa Chuntasaíocht ón gColáiste Ollscoile, Baile Átha Cliath, agus tá Máistreacht san Eolaíocht aige freisin sa Cheannaireacht Feidhmiúcháin ó Ollscoil Uladh.



Is Príomhdhlíodóir í **Sandra Davey** i Rannóg Atur nae na gCoimisinéirí Ioncaim, a stiúrann an Fhoireann Cánacha Indíreacha agus an Oifig Roinne. Tá Máistir Dlíthe (LLM) ag Sandra i gCoireolaíocht agus Ceartas Coiriúil ó Scoil Eacnamaíochta London chomh maith le Baitsiléir Dlíthe (LLB) agus Baitsiléir sa Dlí Corparáideach ó

Ollscoil na hÉireann, Gaillimh. Cháiligh Sandra mar Atur nae in 2010 agus i ndiaidh di dul faoi oiliúint in obair cosanta coiriúla, d'oibrigh sí in Oifig Phríomh-Atur nae an Stáit sular thosaigh sí ag obair leis na Coimisinéirí Ioncaim in 2012.



Bord an Údarás



Is Léachtóir le Cuntasaíocht í **Clodagh Hegarty** agus is Stiúrthóir Cúrsa í i Scoil Ghnó Ollscoil Uladh, Coláiste Mhic Aodha, áit a mbíonn sí ag tabhairt léachtaí go fairsing faoin tuairisciú iniúchóireachta agus airgeadais. Tá Baitsiléir Tráchtála aici ó Ollscoil na Gaillimhe agus Máistreacht Ealaíon sa Chuntasaíocht ó Ollscoil Uladh. Tá sí i mbun taighde faoi láthair ar nuálaíocht seirbhíse i gcleachtais chuntasaíochta bheaga agus mheánmhéide mar chuid dá PhD in Ollscoil Uladh. Is Comhalta de Chomhlachas na gCuntasóirí Deimhnithe Cairte í agus is Comhairleoir Cánach Cairte í. Bhíodh sí ina Cathaoirleach ar Choiste CCDC in Éirinn. Sula ndeachaigh sí leis an saol acadúil, chaith Clodagh 15 bliana ag obair sa chleachtas le EY, Baile Átha Cliath agus sa chleachtadh ginearálta in North West.



Is abhcóide é **David Hegarty** agus tá sé ina Stiúrthóir Dlí & Beartas san Údarás um Fhorfheidhmiú Corparáideach. Glaodh chuig an mBarra é in 2006, agus é ag cleachtadh go príomha i réimse na cosanta coiriúla agus an dlí riaracháin. Sula ndeachaigh sé ag obair le UFC, bhí sé ina Abhcóide Comhairleach in Oifig an Chomhairleora Dlí Pharlaimintigh mar ar chuir sé comhairle ar Choimisiún agus Seirbhís Thithe an Oireachtais

agus ar choistí parlaiminteacha ar ábhair a bhaineann leis an dlí bunreachtúil, an dlí parlaiminteach agus an dlí riaracháin. Bhíodh sé ag obair freisin mar oifigeach dlí i Misean an Aontais Eorpaigh um Riall an Dlí sa Chosaiv (EULEX) agus ag an mBinse Speisialta don Liobáin sa Háig, agus é ag obair i nDlísheomraí Breithiúna le breithiúna ó thíortha éagsúla agus coireacht eacnamaíoch, éilliú, mí-úsáid oifige poiblí, coireanna cogaidh agus comhcheilg chun cásanna sceimhlitheoireachta a chur i gcrích á n-éisteacht acu.



Is stiúrthóir neamhfheidhmiúcháin lánaimseartha neamhspleách í **Aisling Kennedy**, a fhónann ar bhord eintiteas seirbhíse airgeadais rialáilte in Éirinn agus sa Ríocht Aontaithe. Tá sí ina cathaoirleach ar an gCoiste Iniúchóireachta ag Athora Ireland plc agus State Street Fund Services (Ireland) Ltd, agus ina cathaoirleach ar ECCU Assurance DAC agus MABS Support CLG. Roimh mhí an Mhárta 2020, d'oibrigh sí ag Swiss Re mar Cheann Praghsála – Saol agus Sláinte – an Ríocht Aontaithe, Éire agus Iosrael. I measc na ról eile a bhí aici roimhe seo tá: Stiúrthóir Cliant ag Mercer, Éire, Stiúrthóir ar Ghnóthaí Gairmiúla ag Cumann na nAchtúirí in Éirinn agus Stiúrthóir um Fhorbairt Gnó le VHI. Is Comhalta agus iar-Chomhalta Comhairle de Chumann na nAchtúirí in Éirinn í Aisling agus is Cleamhnaí í de chuid Ghairm na hAchtúireachta, an Ríocht Aontaithe.



Is í **Aisling McArdle** an Ceann Grúpa Iontrálacha ag Euronext agus tá sí freagrach as iontráil ar liostáil agus trádáil ionstraimí airgeadais ar mhargai Euronext le haghaidh aicmí sócmhainní Cothromais, Fiachais agus Cistí. Is comhalta í freisin d'fhoireann rialála dhomhanda Euronext ag a bhfuil freagrachtaí rialála le haghaidh Euronext Dublin.

Chuaigh sí isteach i Stocmhalartán na hÉireann in 2002 agus bhí ról rialála éagsúla aici laistigh den chuideachta. Thosaigh sí mar Cheann Iontrálacha i mí Eanáir 2021, i ndiaidh di ról an Chinn Rialála a bheith aici i mBaile Átha Cliath agus i Londain. Stiúran Aisling foireann mhór ildlínse, agus tá sí freagrach as an rannpháirtíocht rialála le heistitheoirí agus rannpháirtithe margaidh. Glacann sí páirt sa Lónra Eorpach um Rialachas Corparáideach agus is Ceadúnach í de chuid Chumann na nOifigeach Comhlíontachta in Éirinn.



D'oibrigh **Eida Mullins** sna seirbhísí airgeadais ar feadh breis agus 25 bliain, idir an earnáil phoiblí agus an earnáil phríobháideach. Ina ról reatha ag Banc Ceannais na hÉireann, tá sí ina Ceann Feidhme: Beartas Baincéireachta, Infheistíochta agus Gnólachtaí Íocaíochta sa Stiúrtóireacht Rialála, Beartais agus Riosca Airgeadais.

Bhí ról rialála stuamachta éagsúla aici roimh sin sa Bhanc Ceannais mar Cheann Feidhme: Rannóg Cigireachtaí agus Ceann Feidhme: Rannóg Riosca Airgeadais sa Stiúrtóireacht Anailísíochta agus Cigireachtaí Stuamachta. Tá go leor taithí beartas aici, go háirithe sa Sásra Maoirseachta Aonair/BCE, áit a raibh sí ina Ceann ar Bheartas Maoirseachta na hEorpa. I rith Uachtaránacht na hÉireann ar Chomhairle na mBallstát in 2013, ba í an príomh-shaineolaí í a chuir comhairle ar an Roinn Airgeadais maidir leis an gcaibidlíocht a bhain leis an Treoir agus Rialachán um Cheanglais Chaipitil. Bhí sí ina comhalta de choistí Eorpacha/idirnáisiúnta éagsúla, ina measc dhá Bhuanchoiste den Údarás Baincéireachta Eorpach (EBA) agus Grúpa Saineolaithe an Choimisiúin Eorpaigh maidir le hÍocaíochtaí agus Árachas Baincéireachta. Áiríodh le hobair Eida san earnáil phríobháideach iniúchóir/scrúdaitheoir in Airgeadas Tráchtála Bhanc na hÉireann agus bainisteoir san Aonad Seirbhísí Comhairleacha Rialála in KPMG. Tá Dioplóma i Staidéar Gnó (Baincéireacht agus Airgeadas) aici ó UCD agus Máistreacht i Staidéar Gnó (Seirbhísí Airgeadais) ó Scoil Chéimithe Ghnó Michael Smurfit.



Is Cuntasóir Cairte é **Ronan Nolan** agus bhí sé ina Uachtarán ar Chuntasóirí Cairte Éireann in 2014/2015. Scoir sé mar pháirtí in Deloitte i mí na Bealtaine 2015 tar éis dó a bheith ina pháirtí comhairleach sinsearach agus ina chathaoiríoch ar an ngnólacht.

Leagtar amach in Aguisín I comhdhéanamh an bhoird i ndeireadh na bliana agus athruithe i measc na stiúrtóirí ón uair a foilsíodh an Tuarascáil Bhliantúil deiridh.

Nósanna imeachta an bhoird

Tionóla an bord cruinnithe rialta agus is féidir leis cruinnithe neamhsceidealaithe a thionól más gá sin. Faigheann comhaltaí an bhoird faisnéis sách luath roimh na cruinnithe sin chun gur féidir leo í a mheas agus a thuiscint i gceart.

Tá sceideal ábhar curtha i bhfeidhm ag an mbord, rud atá forchoimeáda go sonrach dó chun críche cinnteoireachta, lena gcumhdaítear na príomhréimsí rialachais, airgeadais, riosca agus formhaoirseachta. Tá ábhair áirithe tarmilgthe chuig coistí boird, mar a leagtar amach anseo a leanas. Tá córas curtha i bhfeidhm ag an mbord freisin chun údarás a tharmligeann go foirmiúil chuig an bPríomhfheidhmeannach.

Ainmnítear comhaltaí an bhoird mar stiúrtóirí ar ÚMICÉ chun gníomhú i gcomhréir leis an reachtaíocht ábhartha agus chun gníomhú chun leas ÚMICÉ agus chun a leas a chosaint agus a chur chun cinn. Tugann na comhaltaí boird uile breithiúnas neamhspleách ar shaincheisteanna a ndéileálann an bord leo. Tá beartas foirmiúil i bhfeidhm ag an mbord chun déileáil le coinbhleachtaí leasa a d'fhéadfadh teacht chun cinn, lena n-áirítear oibleagáidí agus ceanglais maidir le nochtadh lena ndearbhaítear nach nglacfaidh stiúrtóirí páirt in aon phléití ná cinnití i leith aon choinbhleachtaí den sórt sin.

Ráiteas rialachais

Feidhmíonn ÚMICÉ mar chuideachta faoi theorainn ráthaíochta faoi fhorálacha Acht na gCuideachtaí, 2014. Leagtar amach feidhmeanna an bhoird in alt 905 den Acht. Is é an bord atá freagrach as an dea-rialachas a áirithiú. Déanann sé an méid sin trí chuspóirí agus spriocanna straitéiseacha a leagan síos agus cinnití straitéiseacha a dhéanamh maidir leis na príomh-shaincheisteanna gnó uile. Tá an Príomhfheidhmeannach freagrach as bainistiú, rialú agus stiúradh rialta laethúil ÚMICÉ le tacaíocht agus cúnamh na foirne ceannaireachta. Ní mór don Phríomhfheidhmeannach agus don fhoireann ceannaireachta cloí leis an treoir straitéiseach leathan a leagann an bord síos, agus ní mór dóibh a áirithiú go mbeidh tuiscint shoiléir ag na comhaltaí boird uile ar na príomhghníomhaíochtaí agus na príomhchinnití a bhaineann leis an Údarás, agus ar aon rioscaí suntasacha is dóigh a thiocfaidh chun cinn. Cé go bhfreastalaíonn comhaltaí den fhoireann ceannaireachta ar chruinnithe boird go rialta, gníomhaíonn an Príomhfheidhmeannach, atá ina stiúrtóir freisin, mar theagmhálaí díreach idir an bord agus feidhmeannas ÚMICÉ.

Freagrachtaí an bhoird

Leagtar amach obair agus freagrachtaí an bhoird sa sceideal ábhar atá forchoimeáda don bhord, sa chód iompair do chomhaltaí boird, agus i mbeartais bhoird ghaolmhara. Ar na míreanna buana a mheasann an bord áirítear

- dearbhú coimhlíntí leasa;
- tuarascáil an Phríomhfheidhmeannaigh, lena n-áirítear mionsonraí ar obair na n-aonad oibríochtúil éagsúil mar aon le faisnéis airgeadais leanúnach agus cuntais bhainistíochta;

- nithe atá le cinneadh ag an mbord;
- ábhair lena bplé;
- ábhair spéise thráthúla;
- bainistíocht riosca;
- tuarascálacha ó choistí; agus
- an tuarascáil ón Rúnaí.

Cuirtear de cheangal ar an Údarás taifid airgeadais a choinneáil agus ráitis airgeadais a ullmhú i gcomhréir le hAcht na gCuideachtaí, mar a mhionsonraítear sna ráitis airgeadais.

Is é an bord atá freagrach as an bplean agus as an mbuiséad bliantúil a fhorghnó. Déanann an bord faisnéis airgeadais, lena n-áirítear cuntais bhainistíochta lena mionsonraítear an caiteachas iarbhair agus an caiteachas a leagtar amach sa bhuiséad, a mheas ag gach cruinniú sceidealaithe. Tá an bord freagrach as a shócmhainní a chosaint agus, dá réir sin, as bearta réasúnacha a dhéanamh chun calaíoch agus neamhrialtachtaí eile a chosc agus a bhrath.

Measann an bord gurb amhlaidh a thugtar léargas fíorcheart i ráitis airgeadais ÚMICÉ ar fheidhmíocht airgeadais agus staid airgeadais ÚMICÉ an 31 Nollaig 2022.

Ceapachán chuig an mbord

Feidhmíonn an tÚdarás go neamhspleách ar an Rialtas agus tá cosc reachtúil ar an Aire orduithe a thabhairt don Údarás i gcomhlíonadh a fheidhmeanna. Ceapann an tAire comhaltaí (seachas an Príomhfheidhmeannach) ar feadh tréimhsí trí go cúig bliana. Sa ghnáthchúrsa, ceaptar comhaltaí ar feadh tréimhse trí bliana agus ceaptar an Cathaoirleach ar feadh cúig bliana. Leagtar amach in Aguisín I comhdhéanamh an bhoird an 31 Nollaig 2022, agus athruithe ón dáta sin i leith.

Rinne an bord meastóireacht sheachtrach ar a fheidhmíocht féin mar a thuairiscítear sna ráitis airgeadais.

Coistí boird

Forchoimeádann an bord chuige féin an chumhacht coistí a bhunú chun cabhrú leis a fheidhmeanna agus a fhreagrachtaí a chomhlíonadh. Faoi sceideal an bhoird um ábhair fhorchoimeáda, tá téarmaí tagartha i scríbhinn ag gach coiste agus tuairiscíonn siad go rialta don bhord. Ba é an coiste iniúcháireachta agus riosca an t-aon choiste a bhí ann in 2022.

An coiste iniúcháireachta agus riosca

Triúr stiúrthóirí neamhfheidhmiúcháin atá ar an gcoiste iniúcháireachta agus riosca (CIR):

- Aisling McArdle, Uasal (Cathaoirleach)
- An tUasal David Hegarty
- An tUasal Ronan Nolan

Tá a théarmaí tagartha leagtha amach ina chairt, atá le feiceáil ar shuíomh gréasáin an Údaráis. Leagtar amach sa chairt róil agus freagrachtaí sonracha an choiste, lena n-áirítear athbhreithniú ar thuairiscáil bhliantúil an Údaráis agus ar a ráitis airgeadais sula ndéanann an bord breithniú orthu. I measc na

ngníomhaíochtaí eile a rinne an coiste linn 2022 bhí an méid seo a leanas:

- athbhreithniú a dhéanamh ar na córais rialaithe inmheánaigh a bhí i bhfeidhm in 2021, agus moladh dearfach a thabhairt don bhord;
- machnamh a dhéanamh ar an mbuiséad bliantúil le haghaidh 2023, agus a ghlacadh a mholadh don bhord;
- athbhreithniú a dhéanamh ar phlean athshlánaithe ó thubaiste an Údaráis, a leasaíodh de bharr athbhreithniú iniúcháireachta inmheánach ar 2021;
- athbhreithniú a dhéanamh ar nósanna imeachta fiosrúcháin agus imscrúdaithe ÚMICÉ faoi alt 933 agus 934, i ndiaidh leasuithe suntasacha in 2019/2020;
- maoirsiú ar an bpróiseas roghnaithe le haghaidh iniúcháirí inmheánacha don tréimhse 2023–2025; agus
- meastóireacht a chur i gcrích ar a fheidhmíocht féin.

Ina theannta sin, breithníonn an coiste an clár rioscaí iomlán ag gach cruinniú, agus cuireann sé moltaí faoi bhráid an phríomhoifigigh riosca agus/nó an bhoird de réir mar is iomchuí.

Sceideal tinrimh, táillí agus costais

Rinneadh mionsonraí i dtaobh na dtáillí agus na gcostas a íocadh le comhaltaí a nochtadh i ráitis airgeadais an Údaráis, agus soláthraíodh don Aire iad.

Príomhathruithe pearsanra

Is ar an mbord stiúrthóirí agus ar an bPríomhfheidhmeannach, is stiúrthóirí freisin, atá an fhreagracht eisiach gníomhaíochtaí pleanála, stiúrtha agus rialaithe ÚMICÉ a dhéanamh. Leagtar amach in Aguisín I mionsonraí i dtaobh athruithe i gcomhaltas an bhoird.

Nochtaí a cheanglaítear faoin gCód Cleachtais chun Comhlachtaí Stáit a Rialú

Tá an bord freagrach as deimhin a dhéanamh de gur chomhlíon ÚMICÉ ceanglais an Chóid Cleachtais chun Comhlachtaí Stáit a Rialú (an Cód), arna fhoilsiú ag an Roinn Caiteachais Phoiblí agus Athchóirithe i mí Lúnasa 2016. Ceanglaítear na nithe seo a leanas a nochtadh faoin gCód:

- Leagtar amach i Nóta 14 de ráitis airgeadais an Údaráis anailís ar luach saothair iomlán na bhfostaithe (tuarastail agus sochair eile san áireamh, ach gan ranníocaíochtaí aoisliúntais fostóra san áireamh) ina leith siúd a thuilleann os cionn €60,000;
- Leagtar amach i Nóta 16 de ráitis airgeadais an Údaráis anailís ar thaisteal agus ar chothú;
- Leagtar amach i Nóta 17 de ráitis airgeadais an Údaráis anailís ar an gcaiteachas ar chomhairleoireacht;
- Níor thabhaigh an tÚdarás costais faoin gceannnteideal ‘Costais Dlí agus Socraíochtaí’ in 2022. Baineann na costais dlí go léir a tabhaíodh le comhairle dlí ghinearálta; agus
- Leagtar amach i Nóta 18 de ráitis airgeadais an Údaráis anailís ar an gcaiteachas ar fháilteachas.

Ráiteas i dtaca le comhlíonadh

Is deimhin le ÚMICÉ gur chomhlíon sé ceanglais uile an Chóid, lena n-áirítear comhlíonadh an Chóid Caiteachais Phoiblí.

Oibleagáidí rialachais agus oibleagáidí eile atá ar an earnáil phoiblí

Oibleagáidí dlí agus rialachais atá ar chomhlacht arna bhunú faoi reacht

Is iad an Rúnaí agus Ceann na Seirbhísí Corparáideacha, atá ina Phríomhoifigeach Riosca freisin, na príomhdhaoine a thugann cúnamh don bhord maidir le deimhin a dhéanamh de go gcomhlíonfaidh ÚMICÉ a oibleagáidí dlí agus rialachais. I gcás inarb infheidhme, rannchuidíonn comhaltaí eile d'fhoireann ÚMICÉ mar is gá le comhlíontacht leanúnach ÚMICÉ maidir lena oibleagáidí.

Príomhcheanglais dlí

Shainithin agus rinne an tÚdarás na bearta is gá lena áirithiú go bhfuil a oibleagáidí dlí á gcomhlíonadh aige. Tá a phríomhcheanglais dlí sainaitheanta aige mar a leanas:

- dlí na gcuideachtaí
- an reachtaíocht sláinte agus sábháilteachta
- an reachtaíocht fostaíochta agus reachtaíocht ghaolmhar
- an dlí cánach, lena n-áirítear na forálacha sin a bhaineann le soláthraithe seirbhíse áirithe ag a bhfuil deimhnithe imréitigh cánach bailí
- na hachtanna cosanta son raí
- acht na dteangacha oifigiúla
- an dlí maidir le heitic in oifigí poiblí agus
- Rialacháin na gComhphobal Eorpach (Íocaíochtaí Déanacha in Idirbhearta Tráchtála), 2012.

Maidir le ceanglais áirithe eile is infheidhme de ghnáth maidir le comhlachtaí reachtúla amhail na hAchtanna um Shaoráil Faisnéise, na hAchtanna um Míchumas, an tAcht fá Choimisiún na hÉireann um Chearta an Duine agus Comhionannas agus an tAcht um Theanga Chomharthaíochta na hÉireann, níl feidhm acu maidir le ÚMICÉ de bhua nár ceapadh é chun na gcríoch sin an tráth seo.

RGCS

Tá Oifigeach Cosanta Sonraí ag an Údarás a bhíonn ag obair leis an bPríomhfheidhmeannach chun formhaoirseacht a dhéanamh ar a oibleagáidí leanúnacha faoi RGCS.

Nochtaí cosanta

Comhlíonann an tÚdarás an tAcht um Nochtadh Cosanta, 2014, agus tá mionsonraí ar a shuíomh gréasáin faoi conas nochtaí den sórt sin a dhéanamh. Áirítear tuairisceán bliantúil ÚMICÉ faoin Acht in Aguisín VI.

Cothromaíocht inscne i gcomhaltas an bhoird

Amhail an 31 Nollaig 2022, cúigear (56%) ban agus ceathrar (44%) fear a bhí ar an mbord, agus ní raibh aon phost folamh. Mar sin chomhlíon an bord sprioc an Rialtais maidir le hionadaíocht 40% ar a laghad de gach inscne ar bhoird stáit.

I bhfianaise chineál reachtúil an phróisis ceapacháin, is teoranta an tionchar atá ag ÚMICÉ ar chothromaíocht inscne a chomhaltais. Is é an tAire a dhéanann formhór na gceapachán ar bhonn ainmniúcháin ó thríú páirtithe, agus níl rogha ag an Údarás ná ag an Aire maidir leis an gceist sin. De réir mar a thagann téarmaí stiúrthóirí chun deiridh, áfach, déanann ÚMICÉ aon scileanna nó taithí ar leith a d'fhéadfadh a bheith tairbhiúil a mheas, agus díríonn sé aird an Aire orthu más ann dóibh. Chun cothromaíocht inscne a chothú ar an mbord, cuireann ÚMICÉ inscne san áireamh leis an méid sin.

Éagsúlacht

Rinne an bord saincheistanna leithne na héagsúlachta a mheas, lena n-áirítear an chothromaíocht inscne agus luach na difríochta a aithint, mar chuid dá phróiseas bliantúil meastóireachta. Meascán fairsing daoine atá ar an mbord, ón earnáil phoiblí agus ón earnáil phríobháideach, ón earnáil tionsclaíochta agus ón saol acadúil. Ar leibhéal eagraíochtúil, feidhmíonn na leibhéil uile faoi réir deighilt inscne 40%/60%, cé is moite de ghráid riaracháin inarb airde an sciar ban i láthair na huaire. I bhfianaise chineál an-speisialaithe a chuid oibre, is minic a fhéachann ÚMICÉ le daoine a earcú agus a choimeád ó chohórt beag gairmithe. D'ainneoin sin, tagann fostaithe ÚMICÉ ó réimse leathan cúlraí agus is iomaí náisiúntacht a bhíonn i gceist leo.

Acht na dTeangacha Oifigiúla

D'fhorbair an tÚdarás plean chun a chinntiú go gcomhlíonann sé ceanglais an Achte i dtéarmaí fógraíochta. Le héifeacht ó mhí Dheireadh Fómhair 2022, déantar an fhógraíocht ábhartha ar fad i nGaeilge agus i mBéarla, rud a sháraíonn íoscheanglas 20% an Achte. Níor tháinig ach fógra amháin dá leithéid chun cinn i rith na tréimhse go deireadh na bliana.

Úsáid fuinnimh

Mar atá thuasluaite, maidir le ceanglais reachtúla áirithe is infheidhme de ghnáth do chomhlachtaí stáit, níl feidhm acu maidir le ÚMICÉ de bhua nár ceapadh é chun na gcríoch sin an tráth seo. Áirítear leo siúd ceanglais na hAchtanna um Fhuinneamh Inmharthana. Mar sin féin, roghnaigh ÚMICÉ tuairisciú ar a shonraí bainistíochta agus feidhmíochta fuinnimh d'Údarás Fuinnimh Inmharthana na hÉireann (SEAI) gach bliain ó 2022.

Tá UM lonnaithe i suíomh oifige amháin, agus níl aon mhótarfeithicil ná réimse eile úsáide fuinnimh aige. Cuimsíonn ídiú an Údaráis:

- téamh spáis trí radaitheoirí a úsáideann gás nádúrtha, a rialaíonn an tiarna talún ar bhonn seirbhísí comhroinnte; agus
- aerchóiriú, uisce te, soilse agus trealamh oifige, a úsáideann leictreachas agus a rialaíonn an tÚdarás féin.

Léiríonn sonraí sealadacha 2022 gur mhéadaigh úsáid fuinnimh ÚMICÉ ón mbliain bhonnline (2009) 4%, d'ainneoin dubailt ar a mhéid cóiríochta agus méadú faoi thrí ar líon na foirne.